

**Nunatta kujataani nannuttassiissutigineqartartut ukiumut sisamaasut 2025-imiit  
ikinnerpaamik ataavartumillu qulinngortinneqarnissaat qulakkeeqqullugu  
Naalakkersuisut peqquneqarnissaannik Inatsisartut aalajangiiffigisassaattut  
siunnersuut**

*Anders Olsenimit, Siumut, saqqummiunneqartoq*

**pillugu**

**siunnersuutip aappassaaneerneqarneranut**

**Aalisarnermut, Piniarnermut Nunalerinermullu Ataatsimiititaliap**

**ISUMALIUTISSIISUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Kristian Jeremiassen, Inuit Ataqtigiit, siulittaasoq

Inatsisartunut ilaasortaq Jens Napātök', Naleraq, siulittaasup tullia

Inatsisartunut ilaasortaq Adam Kristensen, Inuit Ataqtigiit

Inatsisartunut ilaasortaq Mikivsuk Thomassen, Inuit Ataqtigiit

Inatsisartunut ilaasortaq Jens Kristian Therkelsen, Siumut

Inatsisartunut ilaasortaq Karl Tobiassen, Siumut

Inatsisartunut ilaasortaq Aqqalu C. Jerimiassen, Atassut

UKA2024-mi ulloq 21. oktober siullermeerinninnerup kingorna ataatsimiititaliap siunnersuut misissorpaa.

**Siunnersuutip imarisaa siunertaalu**

Kujataani nannuttassat maanna sisamaasunit siunissami ukiumut ikinnerpaamik qulinut amerlineqarnissaannik Naalakkersuisut siunnersuutikkut peqquneqassapput. Kujataani aammalu najugaqarfinnut qaninnerusuni nannut arlaqarnerusut naammattoorneqartalermeta ajornartorsiutip tamatuma iliuuseqarfigineqarnissaa kiisalu nannunniartarnermik inuusaaseqarnerup tamatumani aningaasaqarnerup siunnersuummit iluaquserneqarnissaat siunnersuuteqartumit siunertarineqarpoq.

**Siunnersuutip Inatsisartunit siullermeerneqarnera**

Siunnersuut UKA2024/59-imut peqatigitillugu suliarineqarpoq. Partiinit amerlanerussuteqartunit siunnersuut nalinginnaasumik taparserneqarpoq ataatsimiititaliamullu suliarineqartussanngorlugu innersuunneqarnissaa isumaqatigiissutigineqarluni.

**Apeqqutit siunersiuinerillu**

Siunnersuutip matuma siullermeerneqarnissaa sioqqullugu ataatsimiititaliaq Naalackersuisunut apeqqutitik nassiussivoq. Ataatsimiititaliap apeqqutai Naalackersuisullu akissutaat isumaliutissiissummut matumunnga ilanngussaq 1-itut ilanngunneqarput.

Tamatuma saniatigut Aalisarnermut Piniarnermullu Naalackersuisoq nannut pillugit ataatsimiititaliamit siunersiorneqarpoq. Isumasiuinermit allakkiaq ilanngussaq 2-tut ilanngunneqarpoq.

**Paasisassarsiorluni pulaarneq**

Ataatsimiititaliap suliarinninnermini ulloq 30. oktober Pinngortitaleriffimmut pulaarpoq, tassani ataatsimiititaliaq nanoqatigiiaat, nannunik kisitsinerit assigisaallu pillugit ilisimatinneqarluni.

**Ataatsimiititaliap siunnersuummik suliarinninnera**

Aallarniutigalugu oqaatigineqassaaq – Naalackersuisut akissuteqaataanni tikkuarneqartutut - ukiunut arlalinnut nannuttassiissutit Naalackersuisunit pissaanermik atuutsitsisuusunit aalajangerneqartarmata. Taamaattumillu tamanna pillugu aalajangiiffigisassatut siunnersuummik akuersissutiginninnikkut pisassiissutinik aalajangersimasumik annertussusilinnik aalajangersaaqqullugit Naalackersuisut Inatsisartunit pituttorneqarsinnaagunangillat.

Aalajangiiffigisassatut siunnersuutip taamaattup akuersissutigineqarneratigut nannunik piniarneq illersuinerlu pillugit Namminersorlutik Oqartussat nalunaarutaanni § 5 naapertorlugu nunat tamalaat akornanni isumaqatigiissutit, uumassusilerisut siunnersuinerat, piniartut atuisullu ilisimasaat kiisalu Piniarneq pillugu Siunnersuisoqatigiit ilaasortaannut kommuninullu tusarniaasimanerit isiginiarlugit pisassiissutinik aalajangersaanissamut Naalackersuisut pinngitsoortinneqarsinnaanngillat.

Taamatuttaaq oqaatigineqassaaq nannunik piniarneq illersuinerlu pillugit Namminersorlutik Oqartussat nalunaarutaanni § 5 naapertorlugu nannuttassat ukiumoortumik aalajangersarneqartarmata. Taamaalillunilu pisassiissutinik ataavartunik (imaluunniit ukiunut arlalinnut atuuttussanik) aalajangersaanissaq nalunaarut allanngorteqqaarnagu pisinnaanngilaq. Taamatut allannguinnissaq siunnersuutip allaffissornikkut kingunerisassai pillugit siunnersuuteqartup nassuiaataani tunngavissaatinneqanngilaq.

Ataatsimiititaliamit tulliatut oqaatigineqassaaq siullermeerinninnermi oqallinneq siammasillunilu imartummat, tamatumani sammisaq pillugu isiginiagassat amerlasuut eqqartorneqarlutik. Nunatsinni nanoqatigiiaat nannuttassallu ataatsimut isigalugu oqaluuserineqarput, tassungalu ilanngullugu eqqartorneqarluni nanoqatigiiaat amerliartornersut tamannalu pisassiissuteqartarnikkut qanoq takussutissinneqartariaqaraluarnersoq.

Pisassiissutinik qaffaasinnaanerup isummerfigineqannginnerani Tunumi kisitsinermi inernerit pillugit nalunaarussiaq aappaagu aatsaat saqqummiunneqartussat naatsorsuutigineqartut Naalakkersuisunit utaqeqqaarumaneqartoq Naalakkersuisut siullermeerinninnermi paasissutissiissutigigaat ataatsimiititaliamit maluginiarneqarpoq.

Kujataani pisassiissutinik qaffaanissaq qanoq piviusunngortinneqarsinnaanersoq, nannunniarnermik inuusaaseq aallaavigalugu pisassiissutinik atuinissamat periarfissaqarnerisooq kiisalu Kujataani nannuttassanik qaffaaneq Tunumi nannuttassanut qanoq sunniuteqassanersoq oqaluuserineqarput. Tamakku pillugit ataatsimiititaliaq Naalakkersuisunut apeqquteqarpoq. Tassunga atatillugu Naalakkersuisut akissuteqaataat innersuussutigineqarpoq, ilanngussaq 1. Taamatuttaaq Islandimi pissutsit ataatsimiititaliamit innersuussutigineqassapput, tamatumani nannut angalaaginnartut toqunneqartarput.

**Nuna tamakkerlugu nannuttassiissutit amerlineqarnissaannik suliniuteqaqqullugit Naalakkersuisut ataatsimiititaliamit isumaqatigiittumit kaammattorneqarput.**

**Siunnersuutip aningaasaqarnikkut kingunerisassai**

Aalajangiiffigisassat siunnersuutip piviusunngortinneqarnerani aningaasaqarnikkut allaffis-sornikkullu kingunerisassat siunnersuutip tunngavilersuutitaani nassuiaatigineqartassat Inatsisartut suleriaasianni § 33, imm. 1-imi allassimavoq. Tamanna naapertorlugu siunnersuutip piviusunngortinneqarnerani aningaasaqarnikkut kingunerisassat siunnersuummi taamaalilluni allassimasut ataatsimiititaliamit maluginiarneqarpoq. Ataatsimiititaliaq tamatumunnga annertunerusumik oqaaseqaatissaqanngilaq.

**Ataatsimiititaliap inassuteqaatai**

Siunnersuut akuerineqassasoq ataatsimiititaliamit isumaqatigiittumit inassutigineqarpoq.

Ataatsimiititaliap taama oqaaseqaateqarluni isumaliutissiissummilu allassimasutut paasinnilluni inatsisissatut siunnersuut aappassaaniigassanngortippaa.

---

Kristian Jeremiassen  
Formand

---

Jens Napātók'  
Næstformand

---

Adam Kristensen

---

Mikivsusuk Thomassen

---

Jens Kristian Therkelsen

---

Karl Tobiassen

---

Aqqalu C. Jerimiassen